

Xajon ra ma-ni jàn ra tsikínda jè Juan

Mé kjoanda ra 'sín jè ra 'mì Gayo

¹Jì ndí 'ndsé ra 'mì-li Gayo ra 'nó nda chibé kò ra ngi kò inìma-na nga tsjake-la, tíbindá-la jè xajon rakìi 'an ra xita jchínga 'mì-na ya ingo.

²Jì ndí 'ndsé, 'koaá 'sín tísíjé-la 'an Nainá, nga nda katabitjo ijye ta mé ra 'sín jì, koni 'sín nda tímahachikon'tin inìma-li ra a'ta 'tse Nainá, 'koaá tì'sín nda katijna jè ijo-li nga nímé 'chin kata'se-la. ³Taxkì 'nó kjotsja-na 'kia nga 'ji i'ka 'ndsé ra tsi'kénajmí-na nga 'koaá 'sín tjiníjchí ijo-li koni 'sín tjin kjoakixi a'ta 'tse Cristo. ⁴Tsín jngo-isa kjoa ra kò'sín 'nó tsja 'bé-la inìma-na, ta jé-ní 'kia nga 'nchree nga jñà ra ixti-na xin-la nga 'koaá 'sín inchisíjchá ijo-la koni 'sín tjin ra kjohixi.

⁵Ngaji ndí 'ndsé ra 'nó tsjake-la, 'nó kixi tjiníjchí ijo-li, 'kia nga kò'sín nda tjinisin-la ya ni'ya-li jñà xita xàngieé ra bijchójkon-li ra tì'koa 'én-la Nainá makjiín-la; kò isaá ta nda tjin-isa 'kia nga tì'koa nda tjinisin-la jñà xita xàngieé ra xìn i'nde 'fiì-ni. ⁶Jñà xita xàngieé, 'koaá 'sín tsi'kénajmí kixi ya ngixkon xita naxindá-la Cristo, nga ngaji 'nó tsjachi nga'tsi xita xàngieé kii. Kò'sín nda tisiiko isi 'kia nga kijchòjkon-li; 'tì-la ta mé ra machjeén-la 'kia nga tjimaya ya ndiyáa. Kò'sín tikii koni 'sín nga sasén-la Nainá. ⁷Ngá a'ta 'tse Cristo-ní nga kò'sín ijye tsikínè-la ijo-la jñà xita xàngieé kii, nga kò'sín inchisíxá-la Jesucristo, kò majìn-la nga jñà skaábé tsajmì ra tsjá-la xita ra mì tsa a'ta 'tse Cristo makjiín-la. ⁸Kíí machjeén-ni nga jíén bako-ná nga kisíkeé jñà xita xàngieé kii. Tsa kò'sín kisíkeé, tsó-ni kjoa nga ngásón inchinika'bísén jè 'én kixi ra nda tsò.

Kjoa'cho ra 'sín jè xità ra 'mì Diótrfes

⁹An ijyee ítsikíndá jngo-la xajon nga ísikásén-la jñà xità naxíndá-la Cristo, tanga jè Diótrfes mì kì sasén-la koni 'sín nga tsi'kìn-lajin, nga jè ra mejèn-la ra jè, nga ta jè kotèxoma. ¹⁰Kia nga kijchòo, 'kiaá koxín kixi-la a'ta 'tse nga'tsi kjoa'cho ra tí'sín nga 'ñó 'cho tsò 'én ndiso ra tóbánè-najin. Kò mì tsa ta ya majngo ikon, tí'koaá mì ma-te-la nga sísín-la jñà xità xàngieé ra bijhójkon ya ni'ya-la. Kò jñà 'ndsé kò tichjeé ra mejèn-la nga sùsin-la xità xàngieé, jé batéchjà-la, kò tí'koaá bachrjekàjin-ni ya naxíndá-la Cristo jñà 'ndsé kò tichjeé ra kò'sín síhitjasòn kjonda kii.

¹¹Ji ndí 'ndsé ra 'ñó tsjake-la, kì ya chjingí-la jñà kjoa ra 'cho tjín; jñà chjín-gi-la ji jñà kjoa ra nda tjín. Nga jè xità ra nda 'sín, xità 'tse Nainá-ní; tanga jè xità ra 'cho 'sín, kjè kì be yá-ni ra Nainá.

Kjonda ra 'sín jè xità ra 'mì Demetrio

¹²Ra a'ta 'tse Demetrio nga'tsi-ni xità nga kò'sín tsò nga 'ñó nda tjín koni 'sín tí'sín ra jè, nga skanda jè ra kjoakixi 'koaá 'sín bakón nga jè Demetrio ndaá tjín koni 'sín nga tí'sín ra jè; 'koaá tí'sín bixó-jin nga ndaá tjín koni 'sín nga tí'sín, kò ndaá 'ya-ti ra ji nga 'én kixi-ní koni 'sín nga bixó-jin.

'Én-la Juan ra fehe'ta-ni

¹³Tjín-isa mé 'én ra mejèn-na nga koxín-la, tanga majin-na nga tà xajon sikásén-la, ¹⁴jé ra mejèn-na nga íjkon xátí-la, 'kiaá isa nda jchibanajmié 'kia nga kijchòjkon-la.

¹⁵Kò'sín 'nchán katijna ki'ta inìma-li. Jñà xità ra nda báko-ná ra i 'nde-la tísíhixò'tà-li. Kò'tín-la jñà xità ra nda báko-ná ra ya títajnakò-li, kò'sín Nainá katasíchikon'tin nga jngó jngó-ni ra jñà.